

Ner Cart Co' Mque' Pab Ye's Loo Mèn Ciuda Tesalónica

Mèn co' mblyath no Pab loo zin' co' mxo'f zin' Pab ngo no Pab co'se' mque' Pab ye's loo mèn co' ndxela's loo Diox por cón che'n Crist, mèn co' nqueltàa loo cón che'n Diox le'n ciuda Tesalónica.

1 Daa, co' nac Pab, ngue que'en ye's co' nac ner cart ndxè' loo gu', gu' co' ngòo loo cón che'n Diox por cón che'n Crist, gu' co' nqueltàa loo cón che'n Diox le'n ciuda Tesalónica. Leque tiemp, Silvan no Timote no daa, nu' ngue nii Diox loo gu'. Diox xud na' no Tad Jesucrist na' mcui gu' par nac gu' che'npe' Diox no che'npe' Tad Jesucrist na'. Ndyazen le' Diox xud na' no Tad Jesucrist na' ryo' lezo' li anggàc con' ndac loo gu'. Ndyazen le' Diox xud na' no Tad Jesucrist na' tolo li par yo nagàl lezo' gu' loo Diox no cue ban gu' rye nda gu' no rye ndye'th gu' làth xtàa gu'.

Mèn ciuda Tesalónica co' ngòo loo cón che'n Diox mblu' loo taamas mèn xá mod ngola's mèn ciuda Tesalónica no xá mod ndyubdi's mènà loo Crist.

²Mbezen Diox quix U', Diox, loo Diox por cón che'n ryete gu'. Nte'que' lezon ña'ben cón che'n gu' co'se' mbezen Diox, ne. ³Thidteneque' indxathlasten mbezen Diox quix U', Diox, loo Diox, por cón che'n gu' co'se' mbezen loo Diox xud na' xá mod mxo'f zin' gu' zin'

cón che'n Crist tac ndxela's gu' loo Crist. No mbezen Diox quix U', Diox, loo Diox, cón che'n gu' co'se' mbezen Diox. Tac naneequen xá mod anze'f mbliguth gu' zin' tac nque'que' lezo' gu' Diox no nque'que' lezo' gu' ñèe gu' hues xtàa gu'. Mbezen Diox quix U', Diox, loo Diox por cón che'n gu', ne, tac non daa xá mod ncha'la's gu' tac gu' nzi queeque' lezo' loo con' co' gac loo gu' no con' co' gac che'npe' gu' por cón che'n Tad Jesucrist na'. ⁴Gu' co' ndxàc mèn huesen por cón che'n Crist, Diox nque' lezo' ñèe Diox gu'. Daa naneequel le' Diox mcui gu' par yòo gu' loo cón che'n Diox no par que tee li gu' sirv loo Diox. ⁵Tac co'se' mblu'en loo gu' cón che'n di's ndac, ne'nglu'dena loo gu' xal nac mod co' angndyoodi's mèn. Ndxel'leque', Xpii Natú' mblyath no daa co'se' mblon yalbàn loo gu'. Mblyath no Xpii Natú' gu', ne, axtaque' ngòp gu' yalxla's licque' nac di's cón che'n di's ndac ndxè'. Gu' non no naneequel gu' xá mod mque tee ban daa làth gu' par mcàba con' ndac loo gu'.

⁶Le' por part cón che'n gu' na, gu' mblique' xal mblu' nu' loo gu'. No mblique' gu' xalque' ngòc mod co' mblu' Tad Jesucrist loo gu' par li gu' xal ndyee di's co' mblu' Jesucrist loo mèn. No ndyalque' gu' mbin gu' di's co' nac di's ndac, con gust, xalque' mbli Xpii Natú' ngòca tataa loo gu' mastale'

mxactiì gu' axta plóthe. ⁷Tataa mod leque gu' mblu' gu' xal thìb muestroo loo mèn co' ndxela's loo cón che'n Diox por cón che'n Crist par ned le'n rye yèezya' che'n làaz mèn macedon no rye yèezya' che'n làaz mèn acay xá mod mque tee ban ndac gu' par tataa mod que tee ban ndac mèn, ne. ⁸Por cona, por cón che'n gu' mbyath mbyèn cón che'n di's ndac che'n Diox loo mèn huax lugar. Ne'ngyathte no ne'ngyènte cón che'n di's ndac ante loo mèn yèezya' che'n làaz mèn macedon no mèn yèezya' che'n làaz mèn acay. Ndxle'leque', mbyath di's ndac ndxè' loo mèn ryete lugar co'te' mbìn mèn xal ndxela's gu' loo Diox. Por cona, ya inquinte tolo ta' nu' cuent cón che'n xá mod ndxela'sque' gu' loo Diox no loo cón che'n Diox loo taamas mèn. ⁹Ndxle'leque', ale yub mèn na' nda' cuent no ndyoodi's mèn cón che'n xal mcàba loo gu' co'se' mbi'th too naa nu' gu' no mblu'en cón che'n di's ndac ndxè' loo gu'. Le' gu' na, nabe'ste mblo gu' lezo' gu' co'se' ngo nu' làth gu'. Nda' mèn na' cuent cón che'n gu', ne, xá mod mblá' gu', ya ne'tolode ngue li gu' cas loo rye tatol no rye naxnax no rye mdo' no rye gunab co' mbez gu' ngòc diox gu' ndoore' yila's gu' loo cón che'n Crist. Tataa mbli gu' par ngòc gu' loo cón che'n Diox no par tlo gu', li gu' sirv loo angoluxte Diox co' naban co' nac licpe' Diox co' inquadide mèn. ¹⁰Leque mèn yèezya' che'n làaz mèn macedon no mèn yèezya' che'n làaz mèn acay nda' cuent cón che'n gu' loon xá mod nzi quee lezo' gu' loo con' co' gac loo gu' no co' gac che'npè' gu' axta co'se' gac huiz bere Jesús co' nac xgan' Diox, yi'th Jesús xgan' Diox loo bé', Jesús co' mbli Diox ngro xban làth mèn nguth. Jesús nac xa' co' mtelá' na' loo con' ryes par ne'tetiide Diox na' no ne'zib quide Diox na' co'se' gac huiz co' yilo la's Diox loo mèn no co' yilo tub rez Diox cón che'n mèn.

Trè' ngue lu' cón che'n zin' co' mxo'f zin' Diox loo Pab.

2 Pues leque gu' co' nac mèn huesen por cón che'n Crist, gu' nda' cuent co'se' mbal lon yalbàn loo gu', di's co' mblon yalbàn loo gu'a, gu' ngola'sque' di'sa no ndyubdi'sque' gu' di'sa. Ne'ngui'thte nu' anxle' loo gu'. ²Mastale' mbi'th nu' loo gu' loo mtin mèn cuida Filip nu' axta plóthe mblya's mèn cuida Filip, no mxec nu' ngòc ngòc nguàal con' co' mbli no mèn cuida Filip nu', no gu' nda'que' cuent co' mbli no mèn na' nu' co' huenleque', per Diox ne'nglá'ya'de nu'. Ndxle'leque', mbli Diox par mbi'th nu', mblo nu' yalbàn loo gu' co' ndlu' xá mod lyá' mèn loo con' ryes. No con dib axla's mbli nu' con'a, mastale' ngòc nayi' mèn gulàaz gu' ñèe mèn gulàaz gu' nu'. ³Tac co'se' mblo nu' yalbàn loo gu', thib lite nac di's co' mblo nu' yalbàn. Inacte di'sa di's co' alithe ngo nu' yalbàn. Ne' ne' inac di's co' ngo nu' yalbàn di's zab co' ndli par quedii nu' gu'. ⁴Ndxle'leque', ner mbli Diox huax con' loon par ñee Diox ñeene' ché' tyubdizen loo Diox. Ngolaa, ngòoque' lezo' Diox ndlin sirv loo Diox. Por cona, mxo'f zin' Diox zin' cón che'n di's ndac ndxè' loon. Por cona, ngon yalbàn loo mèn tac ngòc lezo' Diox gunèe Diox daa. Ndxle'leque', ingoden yalbàn par yòc lezo' mèn di's co' mbezen loo yalbàn co' ngon. Diox ndli con' loo ryete na' par ñee Diox ñeene' ché' too lezo' na' loo cón che'n Diox. ⁵Tac gu' naneeque' nec thib vez ne'ngliden par asemblin par mdan gust lezo' gu' no par nda' nu' xquith lezo' gu' par lyath no gu' daa loo con' naquin daa. Ne' ne' ndub rez nu' chol di's loo gu' par tataa mod li nu' gan tmi loo gu'. Con' ndxè' nonque' gu' no naneeque' gu'. Yende cón más niin. Diox ngüi'que' loo con' co' nde teele' ndli nu'. ⁶Ne' ne' tar cua'n nu' mod par li nu' le' mèn li

con' guryath no con' guryèn loo nu', que naca gu', o que naca tedib cua' mèn co' nac mèn tedib yèez co' nzo loo cón che'n Crist. Mastale', ngácpe' nu' ngli nu' le' gu' ta' cuent cón che'n nu' le' nu' nacque' mèn co' ndxe' di's che'n Crist no ta' gu' cuent, ne, le' Diox mblec nu' par xo'f zin' nu' zin' ndxè' loo mèn. ⁷Ndxè'leque', ngòc nu' mèn nado' co' ngòp mod làth gu' xal thib xa'got co' nac gundan co' ñee rsi' ñee rso xin' loo gu'. ⁸Anze'f nque' lezo' nu' ñèe nu' gu' axta mblya's nu' li nu' con' ndac loo gu' axta mblya's nu' ta' nu' cuent cón che'n di's ndac loo gu'. No iante cón che'n di's ndac mblya's nu' ta' nu' cuent loo gu'. Ndxè'leque', mblya's nu' gac nu' xal mozpe' gu' co' li sirv loo gu' no tyactii nu' por cón che'n gu' axta gath nu' chele'i naquin tac arid nazin' gu' nu'. ⁹Nte' lezo' gu', mèn huesen por cón che'n Crist, xá mod nguth ngüi' lezo' nu' par mbli nu' zin' ze no yá! par mbli nu' gan thib le' rol lua' par hua nu'. Mbli nu' zin' par ne'ndoo dó'de nu' loo nec thib gu'. Làth xtau'a, mblon yalbàn cón che'n di's ndac che'n Diox loo gu'.

¹⁰Gu' nac mèn co' nda' cuent cón che'n nu'. No ndub hui' Diox loo nu', ne, le' nu', licque', mque tee ban nalique' làth gu' co' ngola's no co' nzo loo cón che'n Diox, no nambii mque tee ban nu' làth gu' co' nac mèn co' ndxela's loo Diox por cón che'n Crist. Mod co' mque tee ban nu' làth gu' ne'ndade nu' lugar loo yende chó mèn quexù' que' fals mèn nu' làth gu', ¿lé? ¹¹Lomisque', nanee gu', ne, xá mod mco'x nu' loo gu' no mtegán nu' lezo' thib thib gu' xal ndli thib gundan yín' gundan ted loo xin' gundana, ¿lé? ¹²Mnibe' nu' loo gu' no mtan' nu' di's loo gu', nabe'ste cue ban gu' xalque' ndxàal cue ban mèn co' ngòo loo cón che'n Diox no mèn co' nac che'npe' Diox. Tac Diox ngurez gu' par yòo gu' co'te' ñibe' Diox no co'te' ndxà'x xnii che'n Diox loo ryethe con'

par gac che'npe' gu' con' roo con' xèn che'npe' Diox, ne.

¹³Por cona, nu' ne, thidteneque' mbez nu' Diox quix Diox loo Diox tac co'se' mbìn gu' di's cón che'n di's ndac che'n Diox co' mblo nu' yalbàn loo gu', gu' mdyal mbìn cón che'n di's ndac no ngola's gu' cón che'n di's ndac. Tac ne'ngònte gu' di'sa no ne' ne' ngala's gu' di'sa xalque' nac di's co' ndyoodi's chol mèn. Ndxè'leque', ngola's gu' loo cón che'n di's ndac che'n Diox xal nac di's co', licque', mtel' Diox loo mèn. Di'sa ndlu' loo gu' xá mod ndxàal que tee ban gu' no xá mod ndxàal li nèe gu' gu', gu' co' ndxela's loo Crist, loo cón che'n Diox. ¹⁴Gu' co' nac mèn huesen por cón che'n Crist, co'se' mdub ngu's mèn gulàaz gu' gu' no mtetii mèn gulàaz gu' gu' axta plóthe, lalque' mxac gu' xal ngòca loo mèn nación Israel co' ndxela's loo Jesucrist, mèn co' naban le'n yèezya' che'n làaz mèn jude. Tac gu', ne, mxactii lomisque' yalndyub ngu's co' mbli no mèn nación gu' gu' xal mxactii mèn nación Israel co' ndxela's loo Jesucrist cón che'n mèn gulàazpe' mèn nación Israel. ¹⁵Mèn nación Israela mbeth Tad Jesús xalque' mbeth mèn nación Israel mèn gulàazpe' mèn nación Israel, mèn co' mde'th di's co' ndxab Diox cón che'n Tad Jesús. Per iante mbeth mènà Jesús, no mèn co' mde'th di's co' ndxab Diox. Lomisque' ne, mchobla' mènà nu' làaz mènà. Indlide mènà con' co' ndxòo lezo' Diox. Ndxè'leque', ale le'le' ndxàc nayi' mènà ñèe mènà chol xtàa mèn. ¹⁶Co'se' ndlya's nu' tyoodi's no nu' mèn co' inacte mèn nación Israel cón che'n di's ndac par bel'que' lyá' mènà loo con' ryes, ne, ale inda'de mèn nación Israel lugar tyoodi's no nu' mènà. Tataa mod, sate más ncu'a'n mènà xquin mènà no xtol mènà. Por lult, ngocloo tín' Diox loo rye mèn dib anax nación Israel par mtetii Diox mènà. Cona, mcàb loo mèn

nación Israel le' Diox mzib quii loo mèn
nación Israel par mxactii mènna.

**Anze'f nguen lezo' Pab ya too
naa Pab mèn co' ngola's loo
cón che'n Crist, mèn co' ngo
ban le'n ciuda Tesalónica.**

¹⁷Gu' co' nac mèn huesen por cón
che'n Crist, co'se' mbii nu' loo gu'
ndxep tiemp, mastale' yende mod hui'
nu' loo gu', nte'que' lezo' nu' máa gu'
no anze'f ndlya's nu' yi'th nee nu' máa
gu' par nedrè'. ¹⁸Anze'f mbly'a's nu'
yi'th nee nu' gu' par nedrè'. Per más
mblyazen gal neen gu', daa co' nac yub
Pab. Huax vez mblyazen gal neen máa
gu'. Per cadque' mbly'a's nu' yi'th nu',
chàa, ndxòo Mebizya' xi'tha. Ncà' ya
yende mod yi'th nu' par nee nu' máa
gu'. ¹⁹Tac ¿xá nee gu'? ¿Cón nac co' nzi
quee lezo' nu', à'? No ¿cón nac co' ndli
ndyac lezo' nu', ne, à'? No ¿cón nac co'
ndli nxyo'f nde' nxyo'f ndla' lezo' nu'
co'se' yi'th xi Tad Jesucrist na', à'? Pues,
gu' nac co' li tyac lezo' nu' co'se' yi'th
Tad Jesucrist na' tedib vez. ²⁰Aa. Licpe'
ba'i, gu'que' nac co' li par tyac lezo' nu'
co'se' gac huiz yi'th xi Tad Jesucrist na'.

3 Por cona, co'se' guneen ya
ne'xecte daa tolo que tee xà'en
loo gu', mblin xtùuz no mdoos lezon
mbyan' ante daa le'n ciuda Aten ²par
tel'en Timote, co' ndxàc huesen por
cón che'n Crist, par nee Timote máa
gu' par nedrè' tac Timote nac thib mbi'
co' nxo'f zin' zin' co' nac che'n Diox.
Timote ndli zin' con daa ned ngue tee
gon yalbàn cón che'n di's ndac cón
che'n Crist co' ndlu' xá mod lýá' mèn
loo con' ryes. Mtel'en Timote loo gu'
par yi'th li nèe Timote gu' no par co'x
Timote loo gu' no li Timote par ye'th
lezo' gu' loo cón che'n con' co' ndxela's
gu' loo Crist. ³Tataa ta' Timote cuent
loo gu' par ne'tyoo xà'de lezo' nec thib
gu' loo cón che'n Crist por cón che'n
yalndyub ngu's no ngòc nguàal con'

co' ndxàc loo gu'. Leque yub gu' nda'le'
cuent co' huenleque' le' Diox mdoos
na' par càba loo na' tyactii na' por cón
che'n Crist. ⁴Más de cona, co'se' be'
ngo non gu'a, mdan cuent loo gu' le'
na' tyactii'que'. Tataaque' ndxàca loo
na' nalle' xalque' mdan cuenta loo gu'a.
⁵Por cona, daa ne, co'se' ne'tolode nxece
daa mque tee xà'en loo gu' no inonte
daa máa gu', cona mtel'en Timote par
li lazen xá mod tolo nque tee ban gu'
loo con' co' ndxela's gu' loo Crist. Tac
anze'f ndyóon no nda noque' lezon
ne'stolque' pá, chàa, mbi'th Mebizya,
mbi'th mdooby'a' Mebizya gu'. No thib
descuid càba loo gu' anxle' gac zin' co'
mbi'th xo'f zin'en loo gu'.

⁶Per nalle' Timote ndye'thle', ngua
Timote loo gu' le'n ciuda Tesalónica. No
nabe'ste mda' Timote cuent loo nu' le'
gu' huenque' nziri' no toloque' ndxela's
gu' loo Crist no loo cón che'n Crist.
Mda' Timote cuent, ne, nzi que'que'
lezo' gu' ñee gu' hues xtàa gu'. Mda'
Timote cuent loo nu' le' gu' nte'que'
lezo' cón che'n nu', ne. No mda' Timote
cuent loo nu' anze'f ndlya's gu' ñee
gu' máa nu' xalque' ndlya's nu' ñee nu'
máa gu', ne. ⁷Por cona, xalque' mèn
co' ndxàc huesen por cón che'n Crist,
mastale' ndyactii nu' no ndub ngu's
mèn nu', co'se' mbìn nu' cón che'n
cuent co' mda' Timote loo nu' cón che'n
gu', ryete nu' mdyac lezo' no mbye'th
lezo' nu' axta plóthe. No ndyac lezo' nu'
cón che'n gu' tac, licque', mbli nèe gu'
gu' loo con' co' ndxela's gu' loo Diox no
loo cón che'n Diox. ⁸Con' co' ndxàc loo
gu' ba' ndli nden' nu' xal mèn co' ngro
xban tac gu' nzi li nèeque' gu' loo cón
che'n Tad Crist. ⁹Por cona, axta ne'
gac gab nu' Diox quix non U', Diox, loo
Diox co'se' mbez nu' Diox por cón che'n
gu' tant ndyac lezo' nu' por cón che'n
gu' co' ndli gu' ndxàc loo nu' loo Diox.
¹⁰Imbedte nu' no indxathlaste nu' mbez
nu' Diox ze no yál' par ta' Diox lugar

loo nu' yi'th nêe nu' máa gu' no par tolo ta' nu' cuent cón che'n di's ndac co' be' ndxàc falt té'th gu', par tolo li nêe gu' gu' loo con' co' ndxela's gu' loo Crist no loo cón che'n Crist.

¹¹Anze'f ndlya's nu' le' yub Diox xud na' no Tad Jesucrist na' xal' ned xal' yó' loo nu' no lyath no Diox no Tad Jesucrist nu' par yi'th nee nu' máa gu' par nedrè'. ¹²No ndlya's nu' le' Diox li par tolo té'th gu' cón che'n Diox no tolo que' lezo' gu' nêe gu' thib xtàa gu' no tedib xtàa gu' no que' lezo' gu' nêe gu' rye mèn xalque' nque' lezon nêen gu'. ¹³No ndlyazen le' Diox li nêe xtùuz gu' no lezo' gu' loo cón che'n Crist. Ndyazen le' gu' gác mèn co' thidteneque' ngro xà' loo cón che'n xab izlyo' par gác gu' che'npe' Diox. Le' sya, co'se' gác huiz co' yi'th no Tad Jesús ryethe mèn co' nguth, mèn co' ryo xban ladpe' huiza, mèn co' ngro xà' loo cón che'n xab izlyo' co' ngòc che'npe' Diox, nec thib mod no nec tedib mod ne'gàpte gu' nec thib dol loo Diox.

Trè' nda' cuent xá mod ndxàal que tee ban mèn par tataa mod yòo lezo' Diox loo mod co' nzi tee ban mèn.

4 Nalle', mèn huesen por cón che'n Crist, ña'ben loo gu' no tan'en di's loo gu' xalque' ñibe' Tad Jesús no xalque' mblu'en loo gu' xá mod ndxàalque' que tee ban gu' no li gu' co' yòo lezo' Diox, tataaque' tolo bli gu' co' yòo lezo' Diox nêe Diox gu'.

²Gu' non no naneeque' gu' xal nac di's co' mnibe'en loo gu' par li gu'i. Por lèe che'n Jesucrist, ñibe'en loo gu' par li gu'i. ³Con' co' ndlya's Diox li gu' nac le' gu', licque', ryo xà' loo cón che'n xab izlyo' par gác gu' mèn che'npe' Diox par ñibe' Diox loo gu'. No gunee lezo' Diox ne'líde gu' yalburrid no ne'cua'nte gu' xin' huan gu'. ⁴Diox ndlya's le' thib thib gu' té'th no ta' gu' cuent xá mod ndxàal li gu' par tyub ban ndac gu'

con thib xin' sa'l gu' par que tee ban li ryop sa'l gu' no par li ryop sa'l gu' con' guryath no con' guryèn loo xin' sa'l gu'.

⁵Ne'cue ban node gu' xin' sa'l gu' xal ndli mèn co' ndyub chol con' ye'rsin' lezo' par ndyub yo'f lezo' mèn par li mèn chol con' ye'rsin' xal ndli mèn co' indlibe'de Diox no mèn co' indxònte cón che'n Diox. ⁶No ne'líde nec thib gu' ryes par quedii gu' hues xtàa gu' nec thib mod par li gu' yalburrid no cua'n gu' xin' huan gu' làth xtàa gu'. Tac Tad Diox anze'f nê tetii rye mèn xalque' mdalen cuenta loo gu' no xal mco'xen loo gu' cón che'n ryete con' ndxè' ndoore'. ⁷Diox mciu na' par cue ban na' xalque' mèn co' ngro xà'pe' loo cón che'n xab izlyo', mèn co' ngòc che'npe' Diox. Indlya'ste Diox cue ban na' loo con' xin' no loo con' cap. ⁸Por cona, ngue niin loo gu': Mèn co' nètè'b di's co' ngue lu'en loo mèn, inacte le' mèn ante ngue tètè'b di's co' mbez chol mèn loo mèn. Ndxè'leque', ngue tètè'b mèn yub Diox co' mblàa Xpii Natú' loo na'.

⁹Per cón che'n xá mod ndxàal que' lezo' gu' nêe gu' mèn co' ndxàc hues xtàa gu', ya inquite que'en ye's loo gu' cón che'n con'a. Tac yub Diox mblu' loo gu' xá mod que' lezo' gu' nêe gu' thib xtàa gu' no tedib xtàa gu'. ¹⁰Tac, licpe' ba'i, tataaque' nque' lezo' gu' nêe gu' mèn co' ndxàc mèn hues xtàa na' par ned le'n rye yèezya' che'n làaz mèn macedon. Per daa ña'b loo gu', mèn huesen por cón che'n Crist, sate más toloque' bli gu' par que' tín' lezo' gu' nêe gu' thib hues xtàa gu' no tedib hues xtàa gu'. ¹¹Fcua'n gu' mod más nagàl gure ban gu'. Con gust bli gu' zin' co' nac zin' co' ndxàc gu' ndli gu' con nít loon loo gu' no con nít loon yéc gu' xalque' mnibe'en loo gu' no xalque' mtan' di's loo gu' par li gu'. ¹²Tataa bli gu' par li mèn co' inzode loo cón che'n Crist con' guryath no con' guryèn loo

gu' no par ne'gàc faltte con' co' naquin gu' loo gu'.

Trè' ndlu' xá mod yi'th Tad Jesucrist loo bé' loo mbii tedib vez.

¹³Ndlyazen niin tedib con' loo gu', ne, mèn huesen por cón che'n Crist: Indlyasten le' gu' tua'te cue par ne'ta'de gu' cuent cón che'n mèn co' ngola's loo Crist no loo cón che'n Crist, co' nee di's, mèn co' nguth. Ndxè'leque', ndlyazen le' gu' ta' cuent co' huenleque' cón che'n mèn par ne'xide yéc gu' no ne'xide lezo' gu' arid por cón che'n mèn xal nzi xi yéc mèn no nzi nxi lezo' mèn, mèn co' inzi queede lezo' loo cón che'n Diox. ¹⁴Tac texal ndxela's na' le' Jesús nguth no ngro xban Jesús, tataaguè' ndxela's na' le' Diox li thidte yi'th no Jesús xpíi no alm rye mèn co' nguth, mèn co' ngola'sque' loo Jesús no loo cón che'n Jesús. Gàc con' ndxè' co'se' yi'th xi Jesús mèn co' ndxela's loo cón che'n Diox por cón che'n Jesús.

¹⁵Por cona, ngue ta' nu' cuent cón che'n con' ndxè' loo gu' xal mbliu' Tad Crist loo gu' le' na' co' be' nzi ban co'se' gac huiz yi'th xi Tad Crist mèn co' ndxela's, ne'gàcte na' mèn co' ya sál' ner Tad Jesús mèn co' nguth, mèn co' ngola's loo Tad Crist no loo cón che'n Tad Crist. ¹⁶Tac leque yub Tad Crist Jesús yi'th loo bé' loo mbii. Cabii gab Tad Crist Jesús: iYa' gu' ndyàa na', ey! Le' sya, thib angl co' ñibe' loo taamas angl cabii gab angla: iYa' gu' ndyàa na', ey! Làth xtau'a, thib angl cabii cuez trompet che'n Diox. Le' sya, mèn co' nguth, co' nac mèn co' ngola's loo Crist Jesús, nerleque' mèn ryo xban. ¹⁷Le' yiloo na, na' co' be' nabanque', chàa, yáp no na' mèn co' nguth co' ngola'sque' loo Crist Jesús, co' ngro xbanda. Bii no na' mèn loo mbii loo bé' le'n xcuaui par ya sál' no na' mèn loo mbii loo bé'. Tataa mod bii no na' Tad Crist Jesús thidteneque'. ¹⁸Por cona, ngue niin loo gu': Ftegán gu' lezo' thib hues xtàa gu'

no lezo' tedib hues xtàa gu' xal ndlu' di's ndxè' loo na'.

5 Per cón che'n tiemp, co' nee di's, lín' no mbe' no huiz co' gac co'se' yi'th Tad Crist, inquinte arid par que'en ye's cón che'n lín' no tiemp loo gu', ndyaquen, mèn huesen por cón che'n Crist. ²Gu' nonque' no nda'que' gu' cuent co' huenleque' cón che'n huiz co'se' yi'th Tad Crist gac huiza thib huiz co' yende chó mèn ta' cuent no co' yende chó mèn mbed. Huiza gac xal co'se' ndlyàa huan' liz mèn thib tiemp co'se' yende chó mèn non yi'th huan'. ³Tac co'se' gab mèn loo xtàa mèn co' ne'tyalte yila's loo Tad Crist: Nase nagàl nziri' mèn, ¿lé'? Yende cón ndyac mèn no yende cón ndli xol loo mèn, ¿lé'? Sya, látha, chàa, gac con' ryes loo mèn. Lyux mèn no gac yalnè co' ten' mèn xal co'se', chàa, nde thib yalnè loo thib xa'got co' ndoo nac xin' par gáal mbed. Ne'lyá'de mèn loo yaltii co' gac loo mèn huiz co' tetii Diox no zib quii Diox mèn. ⁴Per gu', mèn huesen por cón che'n Crist, inacte gu' mèn co' ncuau loo no co' ncuau yéc par cue cuau lezo' gu' par, chàa, gac huiz co' yi'th Tad Crist loo gu' xal co'se', chàa, ndlyàa huan' liz mèn. ⁵Tac ryete gu' nacque' mèn co' ndyub xnii yéc no mèn co' ndyub xnii lezo' loo cón che'n Diox co' nac con' licpe'. Inacte gu' mèn co' ncuau yéc no mèn co' ncuac loo co' nzi tee ban loo yál'cuau. ⁶Por cona, ne'gàcte na' mèn co' nzi cuau lezo' xal mèn co' indxela'ste co' nac xal mèn co' nzi yàt, co' nee di's, nzi tee ban mèn loo yál'cuau. Ndxè'leque', nalas cue na' no ndxe'sleque' cue na' tac nde zin' gaxle' tiemp yi'th xi Crist na'. ⁷Tac gu' naneque', mèn huesen por cón che'n Crist, licque', mèn ndxàt yál'. No mèn co' nac mèn guy, ndyuuz mèn yál'. ⁸Per por part cón che'n na', na' nacque' mèn co' nzi tee banque' loo cón che'n Tad Crist xal mèn co' nzi

tee ndxáal ze. No ndxe'sleque' ndxàal cue ban na'. Ne'gàcte na' xal mèn co' ndyuuz yál'. Ndxè'leque', ñibe' na' loo lezo' na' ante que tee ban na' loo con' ndac. Licque', ndxàal gáp na' yalxla's tìn' loo Diox no que'que' lezo' na' Diox no que'que' lezo' na' ñèe na' hues xtàa na' par ne'yiza'de na' na' loo cón che'n Diox xal ndli thib solndad co'se' ntau' solndad pech solndad con camis yi'f solndad par ne'yaa'dte cuchi lad solndad no par ne'yidin'te bal lad solndad. Tataa mod, ne, cue quee lezo' na' loo con' ndac co' gác loo na' co'se' yi'th xi Crist na' tac na' yòo ban no Diox thidtene yiloo. Tataa li na' par gàca loo na' loo cón che'n Tad Crist xal ndli thib solndad co'se' ndub solndad thib sombrèl yi'f yéc solndad par tau' sombrèl yéc solndad loo con' ryes. ⁹Tac Diox ne'mbecte na' loo cón che'n Crist par tetii Diox na' co'se' tub rez Diox cón che'n rye mèn. Ndxè'leque', mbli Diox mblyá' na' loo con' ryes por cón che'n Tad Jesucrist na'. ¹⁰Tad Jesucrist nguth por cón che'n na' par gàca loo na' co'se' zin huiza, que naca naban na', que naca nguth na', thidteneque' yòo ban no na' Tad Jesucrist. ¹¹Por cona, ngue bez nu' loo gu': Toloque' bli gu' par ye'th lezo' thib hues xtàa gu' no tedib hues xtàa gu'. No bli gu' par tolo té'th no tolo tyubdi's thib hues xtàa gu' no tedib hues xtàa gu' loo cón che'n Tad Jesucrist xalque' ndli gu'.

**Pab mco'x loo mèn co' ngola's
loo Tad Crist, mèn co' ngòo
loo cón che'n Tad Crist.**

¹²Ña'ben loo gu', ne, mèn huesen por cón che'n Crist: Bli gu' cas no gòp gu' mod loo mèn co' ndxàc hues na' co' nxo'f zin' cón che'n Tad Crist làth gu', mèn co' ndyoo ner no co' ndyoo naa loo gu', mèn co' nco'x cón che'n Tad Crist loo gu'. ¹³Ndlyazen bli gu' cas loo mèn a no toloque' que' lezo' gu' ñèe gu' mèn

axta plóthe por cón che'n zin' co' ngue xo'f zin' mèn a loo gu' co' nac cón che'n Crist. No nabe'ste gure ban ndac gu' làth xtàa gu' no toloque' gure ban gu' rye nda gu' no rye ndye'th gu' làth xtàa gu'.

¹⁴Lomisque' ne, mèn huesen por cón che'n Crist, ñibe'en no tan'en di's ndxè' loo gu': Fco'x gu' ndxep loo mèn no gunii gu' ndxep loo mèn nado' di's nado' cuent, loo mèn co' nzi tee za'f. Ftegán gu' lezo' mèn no bli gu' par ye'th lezo' mèn co' nzi tee ndoo xà' lezo' loo cón che'n Crist. Blyath no gu' mèn co' nguu's xtùuz no co' nguu's lezo' loo cón che'n Crist. Ale, fxec yèe gu' no fcha'la's gu' gunèe gu' ryete xtàa gu'.

¹⁵Anderhuen gu' no chó Diox chó nee gu'. Ne'ta'de gu' lugar co xtàa leque gu' con' ye'rsin' co' ndli no xtàa gu' gu' xal ngo xtàa xtàa gu' con' ye'rsin' co' ndli taamas mèn loo xtàa mèn. Ndxè'leque', fcua'n gu' mod tolo li gu' con' ndac loo thib xtàa gu' no loo tedib xtàa gu' no loo ryete mèn dib athu loo izlyo'.

¹⁶Fxo'f nde' fxo'f ndla' lezo' gu' loo ryethe con' co' ndli nxi lezo' gu'.

¹⁷Ne'cuedte gu' no ne'lá'de gu' toloque' gurez gu' Diox cón che'n ryethe con'.

¹⁸Guuz gu': Diox quix U', Diox, loo Diox cón che'n ryethe con' ndxàc loo gu'. Tac con'aque' nac co' nee lezo' Diox no co' ndlya's Diox li gu' tac gu' nac che'npe' Crist Jesús.

¹⁹Ne'tau'te gu' no ne'càde gu' loo Xpii Natú' no loo con' ndlya's Xpii Natú' li Xpii Natú' loo gu' par ye'th lezo' gu' loo cón che'n Tad Diox.

²⁰Ne'tè'bte gu' no ne'xiis node gu' di's co' ngo mèn yalbàn xal ñibe' Xpii Natú' che'n Diox loo mèn par co mèn a yalbàn loo gu'. ²¹Fteche ftexyath gu' xtùuz gu' no lezo' gu' loo ryethe con'. No bli gu' preb loo ryethe con' par ñee gu' ñeene' ché' huen naca o ché' ihuente naca. Làth

xtau'a, fcui gu' con' ndac par li gu'
con' ndac. ²²Fque tee xà' gu' loo
ryethe con' ye'rsin'.

²³Diox co' ndli le' na' nagàl yo lezo'
loo Diox par cue ban na' rye nda na' no
rye ndye'th na' loo xtàa na', Diox li le'
gu' gac mèn co', licque', ngro xà' loo
cón che'n xab izlyo', co' ngòc che'npe'
Diox. Tataa quenap Diox xpìi gu' no alm
gu' no lad gu' par yende chó con' yizi'f
no yiga's loo gu' no yende chó quexù'
gu' co'se' gac huiz yi'th xi Tad Jesucrist
na' na'. ²⁴Diox co' mcui gu', Diox lique'
le' ryete con' ndxè' gacque' loo gu'. Loo
Diox ndxàp na' yalxla's no ndxela's na'
thidtene.

**Pab ngue toodi's lult di's
che'n cart ndxè'. No ngue
nii Pab Diox loo mènà.**

²⁵Mèn huesen por cón che'n Crist,
gurez gu' Diox por cón che'n nu'.

²⁶Gunii gu' Diox loo ryete mèn hues na'
por cón che'n Crist xalque' nac mod co'
nii gu' Diox loo xtàa gu'.

²⁷Daa ngue ñibe' con' ndxè' loo gu' xal
ñibe' Crist loon par niina loo gu'. Blab gu'
cart ndxè' loo taamas mèn co' nac hues
na' por cón che'n Crist co'te' nzo gu', ndee
gu'.

²⁸Ndlyazen le' Tad Jesucrist toloque' li
anggac con' ndac loo gu'. Taandxè' gaca.